



Jens Napātók  
Inatsisartunut ilaasortaq  
Partii Naleraq

/-Maani

## Joint Committee pillugu § 37 naapertorlugu apeqqutip 124-ip akineqarnera

Brev dato: 06-07-2018  
Suliap nr. 2018 - 13753  
All. nr. 8181146

Inatsisartut suleriaasissaanni § 37, imm. 1 naapertorlugu Joint Committee pillugu isumaqatigiisummut tunngasumik Naalakkersuisunut apeqquteqarsimavutit. Apeqqutit uannut akineqartussanngortinneqarsimapput.

Postboks 1614  
3900 Nuuk  
Oqarasuaat (+299) 34 50 00  
Fax (+299) 34 54 10  
E-mail: nap@nanoq.gl  
www.naalakkersuisut.gl

### 1. Joint Committee ilinniartitaanikkut qanoq Kalaallit Nunaat iluaq-sersimavaa?

Joint Committee pillugu isumaqatigiisut ilinniartitaanikkut suliniutinik tullinnguuttuni taaneqartunik angusaqarfiusimavoq, taakkulu ataatsimiinnerni imaqarniliat ukiumoortumillu nalunaarusiat ukiuni 2004-2014-imeersut aqqutigalugit takutinneqarput. Joint Committee-mi 2014-ip kingornagut ataatsimiittoqarsimanngilaq, taamaammallu ukiup taassuma kingorna suliniutigineqartunut iluamik takussutissaqanngilaq, imaanngilarli suliniutigineqartut unitsinneqarsimasut.

Ilinniartitaanernut tunngatillugu suliniutit:

- English Language Fellow (ELF) program. Ilaatigut meeqqat atuarfianni GUX-imilu tuluttoornerup ilinniartitsissutiginerata amerikamiut ikorfartorneqarnera.
- Nuummi Qaqortumilu Niuernermik Ilinniarfinni tuluttut pikkorissartitsinerit.
- TOEFL: (Test of English as a Foreign Language). TOEFL-ip Kalaallit Nunaanni misilitsinnertut atorneqarsinnaanerata periarfissaqarnera. Misilitsinneq USA-mi ilinnialernissamut piumasaqaataavoq.
- Kalaallisuumiit tuluttuumut ordbogimik ineriartortitsinissaq.
- Amerikamiut teqquat: Qarasaasiat, atuakkat, DVD-t aamma amerikamiut atuagassiaat Ilisimatusarfiup/GUX-ip atuagaateqarfianniittut Amerikamiut ambassadeqarfiannit aningaasalersorneqartut.
- Danmarkimi amerikamiut ambassadeqarfiata nittartagaanni ilinnialernissamut suliffimmillu misiliinissamut periarfissanut takussutissaqarfimmik pilersitsineq.

- Dartmouth Collegep ilisimatusarfiullu akornanni suleqatigiinneq, soorlu ilinniartut paarlaaqatigiittarnerat, Kalaallit Nunaanni asimi sulineq aamma ilinniartitsinerit ingerlanneqarnerat.
- Montana State University-p ilisimatusarfiup akornanni suleqatigiinneq, soorlu ilinniartut paarlaaqatigiittarnerat, ilinniartitsinerit ingerlanneqarnerat ataatsimoortumillu ilisimatuussutsikkut suliniutit.
- Ilinniartitsisut ilinniartullu 2010-mi USA-mi "The Inuit and Aboriginal World"-imik taallugu ataatsimeersuarnermi peqataatinneqarnerat saqqummiinerallu.
- Ilinniartunik siunnersuineq: The Fulbright Commission Danmarkilu – USA-mi ilinniarnissamut periarfissat pillugit kalaallit ilinniartut USA Danmarkilu aqutigalugit Amerika Fondet-imit paasissutissinneqarlutillu siunnersorneqarput.
- Amerikamiut ambassadeqarfiat USA-mi ilinniarnissamut periarfissat pillugit kalaallinut Danmarkimi ilinniartunut paasissutissiisarpoq.
- "Diversity Scholarship Program"-imi – Amerikami High Schoolimi akiliunneqarluni atuarnissamut - peqataatitsinissamut piukkunnaatilinnik kattuffiup nassaarnissaa siunertaralugu amerikamiut ambassadeqarfiat "Danish youth for Understanding"-imut aningaasanik tunniussaqqartarpoq.
- International Visitor Leadership Program – inuit ilinniartitaanernut attuumasutillit sapaatip akunneri pingasut angullugit USA-miitinneqartarput, taakkulu tikeraat nunanit tamalaaneersut peqatigalugit amerikami ilinniartitaanernut attaveqaateqarlerlutillu paasissutissinneqartarput.

## **2. Joint Committee ilisimatusarnikkut qanoq Kalaallit Nunaannut iluaqusiisimava?**

Joint Committee ilisimatusarnikkut annerusumik suleqatigiittoqalernissaanut, niueqatigiittoqalernissaanut ataqatigiittoqalernissaanullu iluaqusiisimavoq.

Maannarpiaq ilisimatusarnerup ilinniarnerrullu tungaasigut suli annerusumik suleqatigiittoqalernissaa pillugu Forskningsenhedenip aamma National Science Foundationip akornanni attaveqatigiittoqarpoq. Assersuutitut Kangerlussuarmi aamma Summit Stationimi ukiumoortumik kalaallit, danskit amerikamiullu ilinniartut sermersuarmi aasaanerani atuartarnerat taaneqarsinnaavoq.

Aammattaaq aggustimi amerikamiut kalaallillu ilisimatuut ilinniartitsisullu ilisimatusarneq ilinniartitaanerlu pillugit isumasioqatigiinnissaat pilersaarutaavoq, tassanilu qaninnerusumik suleqatigiittoqarnissaanut siunnersuuteqartoqassaaq, soorlu ilaatigut inuiaqatigiinnut annerusumik ilisimatitsisarnissamik kinguneqartussamik, soorlu faginik pinngortitamut tunngasunut periarfissanut inuusuttut soqutigisaqarnerulernissaat siunertaralugu, taamaalillutik najukkani suliffeqarfiit ullutsinnut sanilliullugu annerusumik amerikamiut/nunat tamalaat ilisimatu-

sarnikkut suleqataanerulernissaat anguniarlugu.

### **3. Joint Committee avatangiisit eqqarsaatigalugit Kalaallit Nunaannut qanoq iluaqusiisimava?**

Joint Committee-mi isumaqatigiissutip immi Kalaallit Nunaanni avatangiisinut iluaqutaasimanninnera nalilerneqarpoq.

Igalikumi Isumaqatigiissut 2004-meersoq ataatsimoortumik nalunaarummik aamma attuumassuteqarpoq: *"Kalaallit Nunaanni avatangiisit pillugit Amerikap Naalagaaffii Peqatigiit naalakkersuisuisa aamma Kunngaqarfik Danmarkip naalakkersuisuisa Kalaallit Nunaanni Naalakkersuisuisalu ataatsimut nalunaarutaat"-mik ilaneqarpoq*". Ataatsimoortumik nalunaarummi tassani ersersinneqartoq tassaavoq avatangiisit pillugit suleqatigiissitaaqqamik pilersitsisoqarnissaa, taannalu Permanent Committee-mut 1991-imi isumaqatigiissummut ilaasoq malillugu pilersinneqartumut attaveqataasussaavoq aammalu USA-p aamma Danmarkip/Kalaallit Nunaata akornanni paasisutissanik avitseqatigiinnissanut isumaqatigiinniarnernullu ataatsimut naapittarfittut atorneqarpoq.

Suleqatigiissitaaqqami sulinermi siullertut Pituffimmi illersornissamut tunngasuni avatangiisinut tunngatillugu apeqqutit tunngassuteqarput. USA avatangiisitigit pitsaassutsikkut qaffasinnerpaaq Thule Air Base-mi atorneqarnissaanik pisussaaffilerneqarsimavoq - apeqqutaatinnagu kalaallinit amerikamiunilluunniit ingerlataanersoq. Aammattaaq Kalaallit Nunaat Pituffimmi avatangiisitigit pissutsinik paasisimasassanut isersinnaalissaaq, taamaattorli Pituffimmi sakkutuut suliaat ataqqillugu.

Suleqatigiissitaaqqami sammisani tigussaasuni assersuutitut taaneqarsinnaavoq Pituffimmi ataatsimut paasiniaajartortoqartalenera, tamannalu kingullermik 2016-imi pivoq.

### **4. Joint Committee isumaqatigiissut tunngavigalugu Kalaallit Nunaannut aningaasaliisimava? Qassit?**

Joint Committee-mi suleqatigiinnissamut killiliussat iluini suliniutit suliarinissaannut aningaasanik immikkut immikkoortitsisoqarsimannigilaq. Suliniutit suliffeqarfiit peqataasut namminneq killiliussaasa iluini aningaasalersorneqarput.

Apeqqutigineqartumut nr. 1-imut akissutigineqartumut tunngatillugu soorlu erseqqissarneqareersoq 2014-ip kingornagut Joint Committee-mi ataatsimiittoqarsimannigilaq, illuatungeriilli 2018/2019-imiit Joint Committee-mi suleqatigiinnerup aallarteqqinnissaa pillugu isumaqatigiissimapput.

### **5. Joint Committee Kalaallit Nunaannut takornariaqarnikkut qanoq tunniussaqrpa, takornarissat amerliarsimappat? Kalaallit Nunaat takornariarfissatut ussassaarutigineqartarpa?**

Joint Committee pillugu isumaqatigiissutip Kalaallit Nunaanni takornariaqar-  
nikkut ineriartornermut malunnartumik sunniuteqarsimanissaa ilimagineqanngi-  
laq. Takornariaqarnikkut Kalaallit Nunaata pilerisaarutigineqarnera Visit Green-  
land A/S-imit isumagineqarpoq.

Med venlig hilsen  
Inussiarnersumik inuulluaqqusillunga

  
Vivian Motzfeldt